

ইউডার সমাবর্তনে শিক্ষামন্ত্রী মুনাফালোভী বিশ্ববিদ্যালয়ের বিরুদ্ধে কঠোর ব্যবস্থা

নিজস্ব প্রতিবেদক ▷

শিক্ষামন্ত্রী নুরুল ইসলাম নাহিদ বলেছেন, 'শিক্ষার স্বার্থবিরোধী কোনো প্রতিষ্ঠান টিকে থাকতে পারবে না। সবাইকে আইন মেনে চলতে হবে। কিছু বেসরকারি বিশ্ববিদ্যালয় এখনো ন্যূনতম শর্ত পূরণ করতে পারেনি। অধিকাংশই এখনো স্থায়ী ক্যাম্পাসে যেতে পারেনি। তাদের জন্য আমরা সময় বেঁধে দিয়েছি। এর পরই মুনাফালোভী বিশ্ববিদ্যালয়গুলোর ব্যাপারে কঠোর ব্যবস্থা নেওয়া হবে। গতকাল বৃহস্পতিবার রাজধানীর বঙ্গবন্ধু আন্তর্জাতিক সম্মেলন কেন্দ্রে ইউনিভার্সিটি অব ডেভেলপমেন্ট অস্ট্রেলিয়ার (ইউডা) পঞ্চম সমাবর্তনে সভাপতির বক্তব্যে শিক্ষামন্ত্রী এসব কথা বলেন। এবারের সমাবর্তনে বিশ্ববিদ্যালয়ের স্নাতক ও স্নাতকোত্তরের মোট এক হাজার ৩৬০ জন শিক্ষার্থীকে সনদ প্রদান করা হয়। এর মধ্যে চ্যান্সেলর অ্যাওয়ার্ড পায় আটজন শিক্ষার্থী। আর অ্যাওয়ার্ড অব মেরিট ফ্রেস্ট পায় ১৭ জন শিক্ষার্থী। শিক্ষামন্ত্রী বলেন, 'সব শিক্ষার্থী যাতে স্নাতক জ্ঞান আহরণ করতে পারে সে বিষয়ে পাঠদান করতে

বিশ্ববিদ্যালয়গুলোকে আরো ভূমিকা রাখতে হবে; শিক্ষাদানের পদ্ধতি উন্নত করতে হবে। বিশ্ববিদ্যালয়গুলোর থাকতে হবে বিশ্বজনীন দৃষ্টিভঙ্গি। সমাবর্তন বক্তার বক্তব্যে বিশ্ববিদ্যালয় মঞ্জুরি কমিশনের সাবেক চেয়ারম্যান অধ্যাপক ড. এ কে আজাদ চৌধুরী বলেন, 'বিশ্বায়নের এ যুগে বৈশ্বিক প্রতিযোগিতায় টিকে থাকতে হলে উচ্চশিক্ষায় বিজ্ঞান, প্রযুক্তি এবং উদ্ভাবনী শক্তির বিকাশ ঘটানো একান্ত প্রয়োজন।' বিশ্ববিদ্যালয়ের বোর্ড অব ট্রাস্টিজের সভাপতি অধ্যাপক মুজিব খান বলেন, 'এখন পাস করেও শিক্ষার্থীদের চাকরির নিশ্চয়তা নেই। আজকে ফিজিকস পড়েও ব্যাংকে চাকরি পাওয়া যায়। তাই এ বিষয়ে একটি নীতিমালা থাকা জরুরি। আর এখন অহরহ বেসরকারি বিশ্ববিদ্যালয় হচ্ছে। যে বিশ্ববিদ্যালয়ে শিক্ষক নোই, ঠিকমতো পরীক্ষা নেওয়া হয় না, তার দায়ভার মন্ত্রণালয় ও ইউজিসিকেই নিতে হবে।' সমাবর্তনে আরো বক্তব্য দেন বিশ্ববিদ্যালয়টির উপাচার্য অধ্যাপক ড. এমাজউদ্দীন আহমদ, উপ-উপাচার্য ড. মোহাম্মদ রহমতুল্লাহ প্রমুখ।